



DIPOTŠIŠO LE DIKARABO KA LENANEO LA ELEKTRONIKI LA GO INGWADIŠETŠA GO ENTELWA (EVDS)

- 1. Ke direng ge ke ile ka ingwadiša lenaneong la EVDS kgajana eupša ke saka ka humana molaetša wa goya go entelwa?**

Ge o ingwadišitše, nako ya gago ya go entelwa e tla fihla. Leina la gago le loketšwe direkhoteng tša rena ebile mohlang ketelo ya go entelwa e ba gona lefelong leo o tšwago go lona, o tla hwetša SMS. E ba le pelotelele; go ka se tlogelwe motho mo lesolong la rena la go entela.

- 2. Ke swanetše go letela molaetša wa goya go entelwa nako ye kaakang?**

Go hwetša SMS ka pela ya ketelo ya gago ye mpsha go laolwa ke gore go nale mafelo a makae a go hlaba meento mo o tšwago. Ka ge mafelo a mantši a go hlaba meento a le gare a bulwa beke ka beke, dinako tše ntši tša diketelo di tla hwetšagala ebile o tsebišwa e sale ka pela ka ketelo ya gago ya go yo hlaba moento.

- 3. Ke direng ge ke ingwadišitše lenaneong la EVDS eupša nna ke sa ka ke hwetša molaetša wa go kgonthišiša gore ka nnete o ingwadišitše?**

Morago ga go ingwadiša lenaneong la EVDS o swanetše go hwetša molaetša wa go kgonthišiša gore ka nnete o ingwadišitše ebile o letile go beakanyetšwa moento wa gago. Ge o se wa hwetša SMS ye, boela wepsaeteng ya vaccine.enrol.health.gov.za go kgonthišiša ge eba ka nnetennete kgopelo ya gago e atlegile ka go lokela nomoro ya gago ya pasa.

- 4. Ke direng ge ke ingwadišitše pele ga ba bangwe eupša nna ke sa ka ke hwetša molaetša wa goya go entelwa?**

Lenaneo la EVDS le šomiša melao ye swanago go mang le mang ka lefapheng la praebete le la mmušo ka bobedi ga ona. Diketelo di laolwa ke palo ya mafelo a go hlaba moento fao o tšwago gona. Go fa mohlala, ge o dula lefelong leo go lona go nago le mafelo a mantšinyana a go hlaba meento, o tla hwetša SMS ka pela go feta motho yo mongwe wa go dula lefelong leo gabjale go nago le mafelo a se makae a go hlaba meento. Diketelo di laolwa gape ke dinako tšeo

o ikgethetšego tšona go swana le mesong goba mathapama gare ga beke goba mafelelong a beke. Bašomedi ba rena ba tša Maphelo ba gare ba tšwelapele go entelwa le go bewa pele ga bohle go netefatša gore ba bolokega ge ba thekga twantšho ya rena kgahlanong le *COVID-19*.

5. Ke ingwadišeditše go hlaba moento le setlamo saka sa *medical aid*; go santše go hlokagala gore ke ingwadiše lenaneong la EVDS?

Tše dingwe tša ditlamo tša di-*medical aid* di tla go kgopela gore o ingwadiše lenaneong la tšona gore ba tle ba kgone go romela tshedimošo ka meento. Le ge go le bjalo, o santše o nyakega gore o ingwadiše lenaneong la EVDS. Ke wona mokgwa o le noši wa go rulaganya ketelo ya gago, go sa kgathale gore naa o entelwa lefelong la mmušo goba la praebete, goba o nale *medical aid*.

6. Setlamo saka sa *medical aid* se lefela gore ke entelwe; afa ke swanetše go latela tshepedišo ya go swana le ya ka lefapheng la mmušo?

Setlamo sa gago sa *medical aid* se swanetšego latela melao ya lesolo la bosetšhaba la meento la go thewa ke Kgoro ya Maphelo. Ditlamo tša di-*medical aid* di dumeletšwe fela go entela sehlopha sa mengwaga ye itšego go ya ka fao go tsebagaditšwego ke Kgoro ya Maphelo. O tla botšišwa lenaneong la EVDS ge eba o nale *medical aid*. Ge o nale le ona, o tla swanela ke go fana ka leina la setlamo sa *medical aid* wa gago gotee le nomoro ya *medical aid* wa gago. Peakanyo ya EVDS e tla leka ka botšohle go romela maloko ao a nago le di-*medical aid* mafelong a praebete (ge eba le gona mo o tšwago) eupša go ka direga gore ba romelwe lefelong la mmušo.

7. Aterese yaka e fetogile, nka fetošā bjang aterese yaka lenaneong la EVDS?

Boela faeleng ya gago lenaneong la EVDS o lokele tshedimošo ya gago ye mpsha. Gobane faele e tee e šomišana le nomoro ya pasa e tee, go ka se kgonagale gore mo direkhoteng tša rena o be le dikhopi tše dintši tša difaele ka nomoro e tee ya pasa. Lenaneo la EVDS le tla go bulela faele ya gago go ya ka nomoro ya gago ya pasa gore o lokela diphetogo dife goba dife tšeo o hlokago go di dira ka faeleng ya gago. EVDS e hlamilwe ka mokgwa wo o kgontšhago batho go dira diphetogo le go tsentšha tshedimošo ye mpsha difaeleng tša bona.

Boingwadišo bja gago bo ka se ipušeletše direkhoteng tša rena gobane o šomiša nomoro ye swanago ya pasa.

8. Nka kgona goya lefelong la go hlaba meento leo e sego le ke le abetšwego?

Batho ka moka bao ba hweditšego melaetša ya go ba tsebiša ka diketelo tša bona ba hlohleletšwa go ya mafelong ao ba a abetšwego a go hlaba meento. Molaetša wo o kgonthišiša gore o tla entelwa nakong ya ketelo ya gago ka ge selekanyo sa moento se setše se tšwile ka leina la gago.

Le ge re kopane le mathatanyana ka batho bao ba itlelago ka bobona mafelong a go hlaba meento ka beke ya mathomo ya ge re thomiša ka lenaneo la meento, kgoro e kgopela batho go EMIŠA setlwaedi se. Kabaganyo ya meento ya rena e rulagantšwe ka šedi ye kgolo. Re lekalekanya kabo le nyakego ya meento go netefatša gore go nale dilekanyo tše lekanetšego letšatši lefe goba lefe.

Go etela lefelo leo o le kgethetšwego go re thuša go phethagatša lesolo la meento ntle le go ba le tlhakatlhakano. Se se thibela batho bao ba kgobokanago le go hlola ditiragalo tša go pitlagana ga batho ba bantši lefelong le tee, tšeo di ka hlolago kotsi ya go phatlalatša bolwetši ka bontši.

9. Naa lenaneo la EVDS le kgetha bjang lefelo leo o swanetšego go romelwa go lona ka ketelo ya gago?

Peakanyo ya EVDS e tlare ka boyona ya go kgethela lefelo la kgauswi le aterese ya ga geno goba aterese ya mošomong yeo o fanego ka yona. Mo mafelong a metsetoropo, peakanyo ye e tla kgetha lefelo la go se fete bokgole ba dikhilomitara tše 10 go tloga fao o dulago goba o šomelago gona mola mafelong a dinagamagae o tla kgethelwa senthara ya bokgole ba go se fete dikhilomitara tše 30 go tloga fao o dulago goba o šomelago gona. Nako yeo o e kgethago gore o hlabelwe ka yona nakong ya ge o ingwadiša go swana le mesong goba mathapama gare ga beke goba mafelelong ga beke le yona e ama go hwetšagala ga letšatši leo o le kgethilego le go rulaganywa ga ketelo ya gago ya go yo hlaba moento.

10. Go tla direga eng ge ke ikela lefelong la go hlaba meento ka bonna ntle le go bitšwa?

Re dira boipiletšo bathong gore ba se ikiše ge ba se ba bitšwa. Go ikela ka bowena lefelong la go hlaba meento ga gore gore o tla entelwa ka yona nako yeo. Mafelo a go hlaba meento a ka thuša ka go ngwadiša batho ba mengwaga ye 60 le go feta mo EVDS. Go ingwadiša inthaneteng e sale ka pela le go kgethelwa nako ya gago ya go entelwa ke mokgwa wo mokaonekaone wa go netefatša gore o hwetša moento wa gago.

11. Go tla direga eng ge ke fetilwe ke ketelo yeo ke e beetšwego ya go ya go entelwa?

Lenaneo la EVDS le tla re ka bolona la beakanya ka lefsa ketelo ya gago ye

tlago gomme la go romela SMS ye nago le letšatšikgwele le leswa la ketelo ya gago. O tla fiwa menyetla ye meraro – molaetša wa mathomothomo le gape melaetša ye mengwe gape ye MEBEDI. Ge o saka wa kgona go ya diketelong tšeo o di beakanyeditšwego, gona o tla swanela ke go letšetša mogala wa thušo wa COVID mo go 0800 029 999 o ba kgopele gore ba go ngwadiše gapegape. Rekhote ya boingwadišo ba gago e tla dula e le gona peakanyong ya EVDS eupša re ka se kgone go e šomiša re sena tsebo ya gore naa o mo lifing, o kgole, o a lwala goba o hlokofetše, ka gona, go hlokega gore wena o ikgokagantšhe le rena gore re kgone go tseba gore re ka kgona go e šomiša go ba bjang.

12. Nka dirang ge ke sena mangwalo a boitsebišo?

Kgoro ya Maphelo e gare e šogana le peakanyo yeo e tla dumelelago batho ba go hloka dipukwana tša boitsebišo go entelwa. Tshedimošo ka moka ya peakanyo ye e tlo tsebagatšwa go se goye kae. Morerokgolo ke go kgona go akaretša bafaladi ka moka ba go hloka ditokumente tša maleba tša goba ka mo nageng gotee le batho ba go hloka dipukwana tša boitsebišo.

13. Nka ingwadiša ka mkgwa mang ge ke sena inthanete?

Bao ba se nago inthanete goba difounu tša go ba le inthanete ba ka ingwadiša ka SMS ka go kgotla *134*832* le nomoro ya pasa#, ge o sena nomoro ya pasa, kgotla *134*832#. Boingwadišo bo ka dirwa gape ka WhatsApp ka go romela lentšwana le “REGISTER” go 0600 123 456. Boingwadišo ka SMS le ka WhatsApp ke mahala; ga go hlokege gore o be le *data* goba *airtime* go ikhweletša ditirelo tše.

Ge o sa kgone go šomiša mekgwa efe goba efe ye filwego, o ka ya lefelong la ditirelo tša maphelo wa kgopela bašomedi ba fao gore ba go thuše go ingwadiša. Baetapele ba bantši ba setšhaba (ba sedumedi, ba dipolotiki, ba setšo le ba dikgwebo) le bona ba ikgafile go thuša batho go ingwadiša inthaneteng. O ka kgopela gape le moagišane wa gago goba moswa yo a tsebago go šomiša didirišwa tše.

14. Naa batho ba mengwaga ya ka fase ga 60 ba ka ingwadiša go EVDS?

EVDS e tlare ka boyona ya hlakantšha mengwaga ya gago go tšwa nomorong ya gago ya pasa ebile e tla go botša ge eba o sale yo monnyane gore o ka entelwa nakong ye. Lesolo la meento le šomiša mengwaga go feta malwetši a mangwe go bona gore o tla entelwa neng. Tona ya Maphelo o tlo tsebagatša gore boingwadišo ba batho ba mengwaga ye itšego bo tla bulwa neng.

Dinyakišišo di laetša gore mengwaga e nale khuetšo ye kgolo go feta malwetši a mangwe ao motho a ka bago le ona ka ge e le yona e laolago ge eba o tla

feleletša o le ka bookelong goba o hlokofetše ka baka la *COVID-19*. Malwetši a mangwe a mantši le ona a tlwaelegile bathong ba bagolo.

15. Go nyakega eng go ingwadiša lenaneong la EVDS?

Go ingwadiša go EVDS o swanetše goba o nale nomoro ya gago ya pasa goba ya pasporoto le ya karata ya setlamo sa *medical aid* (ge o nale le sona) mo go wena. Kgato ya mathomo ke go bula faele ka go tlatša foromo ya ditšithale ka go tlatša tshedimošo ya gago ye latelago: Leina le sefane, letšatši la matswalo, bong, aterese ya imeile, nomoro ya sellathekeng le aterese ya lefelo la mo o dulago goba mo o šomago.

O tla hwetša SMS ya go kgonthišiša gore o ingwadišitše ebile o mo mothalading wa go beakanyetšwa ketelo ya go yo hlaba moento. Ge nako ya gago ya go entwa e fihla, peakanyo ya EVDS e tla go romela SMS ye nago le letšatšikgwedi le lefelo leo o tla entelwago go lona. Ge o sena sellathekeng goba aterese ya imeile, o ka ikela mafelong a ditirelo tša bongaka wa kgopela bašomedi ba fao gore ba go thuše.

16. Go direga eng ka tshedimošo ye ke fanago ka yona lenaneong la EVDS?

Tshedimošo yeo o fanego ka yona nakong ya bongwadišo e thuša ka dithulaganyo, ka gobane tshedimošo ye tšwago dipeakanyong tša EVDS e dumelela mmušo go abaganya meento mafelong a go hlaba meento. Ka yona peakanyo ye mmušo o kgona go netefatša gore meento ye lekanego e gona ka letšatši le itšego la go hlaba meento. Tshedimošo ye e šomišwa gape go boledišana le wena mabapi le lenaneo la meento ge go le maleba. Tshedimošo ka moka ya EVDS e bolokwa ka tshwanelo ebile peakanyo ya EVDS e latela melao ka moka ye maleba ya mananeo a polokelo ya tshedimošo.